

藝術典第四百二十七卷

醫部彙考四百七

小兒初生諸疾門一

黃帝素問 奇病論篇

帝曰人生而有病顛疾者病名曰何安所得之岐伯曰病名爲胎病此得之在母腹中時其母有所大驚氣上而不下精氣并居故令子發爲顛疾也

註

此女子胞之爲病也有所大驚則氣暴上而

不下夫精以養胎而精氣并居者也母受驚而氣上則子之精氣亦逆故令子發爲顛疾也愚謂顛當作癲按嬰兒癲癩多因母腹中受驚所致然癲疾者逆氣之所生也故因氣上逆而發爲癲疾兆璜曰胎中受病非止驚癩妊娠女子飲食起居大宜謹慎則生子聰俊無病長年

唐孫思邈千金方 初生出腹論

小兒初生出腹骨肉未斂肌肉猶是血也血凝乃堅成肌肉耳其血沮敗不成肌肉則使面目繞鼻口左右悉黃而啼閉目聚口撮面口中乾燥四肢不能伸縮者皆是血脈不斂也多不育若有如此

者皆宜與龍膽湯也

兒生落地不作聲者取煖水一器灌之須臾當啼兒生不作聲者此由難

產氣少故也可取兒臍帶向身却將之令氣入腹仍呵之至百度啼聲自發亦可以葱白徐徐鞭之

卽啼

兒生十許日怒啼似衣中有刺者此或臍燥迴刺其腹當解之易衣更裹仍以溫粉粉之

若臍不愈燒絳帛末粉之若過一月臍有汁不愈燒蝦蟆灰粉之日三四度若臍中水及中冷則令

兒腹絞痛天紕啼呼面目青黑此是中水之過當炙粉絮以熨之不時治護臍至腫者當隨輕重

者便灸之乃可至八九十壯輕者臍不大腫但出汁時時啼呼者擣當歸末和胡粉傅之炙絮日熨

之至百日愈以啼呼止爲候

按初生小兒針灸不可妄施茲云灸之可至八九十壯雖今古異宜亦須斟酌

若兒糞青者冷也與臍中

水同

乳哺不進者腹中皆有痰癖也當以四物紫丸微下之節哺乳數日便自愈小兒微寒熱

亦當爾利之要當下之然後乃瘥

驚痢

新生卽痢者是其五臟不收斂血氣不聚五臟不流骨怯不成也多不全育其一月四十日已上至期歲而痢者亦由乳養失理血氣不和風邪所中也病先身熱掣挺驚啼叫喚而後發痢脉浮者爲

陽痢病在六腑外在肌膚猶易治也病先身冷不驚掣不啼呼而病發時脈沉者爲陰痢病在五臟內在骨髓極難治也 初出腹血脈不斂五臟未成稍將養失宜卽爲病也時不成人其經變蒸

之後有病餘證並寬惟中風最暴卒也小兒四肢不好驚掣氣息小異欲作痢及變蒸日滿不解者並宜與龍膽湯 凡小兒不能乳哺當與紫丸下之小兒始生生氣尙盛但有微惡則須下之必

無所損及其愈病則致深益若不時下則成大疾疾成難治矣凡下四味紫丸最善雖下不損人足以去疾若四味紫丸不得下者當以赤丸下之赤丸不下當倍之若已下而有餘熱不盡當按方作龍膽湯稍稍服之并摩赤膏 風痢亦當下之然當以猪心湯下之驚痢但按圖灸之及摩生膏

不可大下也何者驚痢心氣不定下之內虛益令甚爾驚痢甚者特爲難治故養小兒常慎驚勿令聞大聲抱持之間當安徐勿令驚怖又天雷時當塞兒耳并作餘細聲以亂之也凡養小兒皆微驚以長其血脈但不欲大驚大驚乃灸驚脈若五六十日灸者驚復更甚生百日後灸驚脈乃善

變蒸論

凡兒生三十二日一變六十四日再變變且蒸九十六日三變一百二十八日四變變且蒸一百六

十日五變一百九十二日六變變且蒸二百二十四日七變二百五十六日八變變且蒸二百八十八日九變三百二十日十變變且蒸積三百二十日小蒸畢後六十四日大蒸蒸後六十四日復大蒸蒸後一百二十八日復大蒸凡小兒自生三十二日一變再變爲一蒸凡十變而五小蒸又三大蒸積五百七十六日大小蒸都畢乃成人小兒所以變蒸者是榮其血脈改其五臟故一變竟輒覺情態有異其變蒸之候變者上氣蒸者體熱變蒸有輕重其輕者體熱而微驚耳冷尻冷上脣頭白泡起如魚目珠子微汗出其重者其體壯熱而脉亂或汗或不汗不欲食食輒吐眊目白睛微赤黑睛微白又云目白者重赤黑者微變蒸畢自精明矣此其證也單變小微兼蒸小劇凡蒸平者五日而衰遠者十日而衰先期五日後期五日爲十日之中熱乃除耳兒生三十二日一變二十九日先期而熱便治之如法至三十六七日蒸乃畢耳恐不解了故重說之且變蒸之時不欲驚動勿令傍多人兒變蒸或早或晚不如法者多又初變之時或熱甚者違日數不歇審計變蒸之日當其時有熱微驚慎不可治及灸刺但和視之若良久熱不可已少與紫丸微下熱歇便止若於變蒸之中加以時行溫病或非變蒸時而得時行者其診皆相似惟耳及尻通熱口上無白泡耳當先服黑散以

發其汗汗出溫粉粉之熱當歇便就癰若猶不都除乃與紫丸下之兒變蒸時若有寒加之卽寒熱交爭腹腰天糺啼不止者熨之則愈也

熨法卽灸粉絮熨之

變蒸與溫壯傷寒相似若非變蒸身熱耳熱尻亦

熱此乃爲他病可作餘治審是變蒸不得爲餘治也

又一法凡兒生三十二日始變變者身熱

也至六十四日再變變且蒸其狀臥端正也至九十六日三變定者候丹孔出而泄至一百二十八日四變變且蒸以能咳笑也至一百六十日五變以成機關也至一百九十二日六變變且蒸五機成也至二百二十四日七變以能匍匐也至二百五十六日八變變且蒸以知欲學語也至二百八十八日九變以亭亭然也凡小兒生至二百八十八日九變四蒸也當其變之日慎不可妄治之則加其疾變且蒸者是兒送迎月也蒸者甚熱而脉亂汗出是也近者五日歇遠者八九日歇也當是蒸上不可灸刺妄治之也

宋錢乙小兒直訣 胎驚

小兒初生壯熱吐哕身體強直手足抽掣目反直視是胎驚風證也

註

按前證多因娠婦忿怒驚

恐調攝乖常或挾外邪內傷於胎蓋母有所觸胎必感之當用豬乳膏拭兒口中或用惺惺散加

漏蘆令母煎服使藥通乳中兒病自愈矣

百日內發搐真者不過兩三次必死假者頻發不死真者內生驚癇假者外傷風冷血氣未實不能勝任故發搐口中氣熱用大青膏塗顙浴體二法

註

按前證多因胎中受患或乳母鬱怒傳兒或

兒脾傷自病當固元氣為主而兼治其母仍參吮乳不能類治之後倣此

變蒸

小兒在母腹中乃生骨氣五臟六腑成而未全自生之後卽長骨脉五臟六腑之神智也變者易也自內而外自下而上又身熱故以生之日後三十二日一變蒸卽智意有異於前何也長生臟腑智意故也何謂三十二日長骨添精神人有三百六十五骨除手足中四十五碎骨外有三百二十數自生下骨一日十段而上之十日百段而三十二日計三百二十段爲一變亦曰一蒸骨之餘氣一自腦分入齦中作三十二齒而齒牙不及三十二數者由變不足其常也或二十八日卽長二十八齒已下倣此但不過三十二之數也凡一周遍乃生虛熱諸病如是十周則小蒸畢也計三百二十日生骨氣乃全而未壯也故初三十二日一變生腎生志六十四日再變生膀胱其發耳與骭冷腎

與膀胱俱主於水水數一故先變生之九十六日三變生心喜一百二十八日四變生小腸其發汗出而微驚心爲火火數二一百六十日五變生肝哭一百九十二日六變生膽其發目閉一云目而不開而

赤肝主木木數三二百二十四日七變生肺聲二百五十六日八變生大腸其發膚熱而汗或不汗

肺者金金數四二百八十八日九變生脾智三百二十日十變生胃其發不食腹痛而吐乳此後乃

齒生能言知喜怒故云始全也太倉云氣入四肢長碎骨於十變後六十四日長其經脉手足手受

血故能持物足受血故能行立也經云變且蒸謂蒸畢而足一歲之日也師曰不汗而熱者發其汗

太吐者微止不可餘治是以小兒須變蒸蛻齒者如花之易苗所謂不及三十二齒者由變之不及

齒當與變日相合也年壯而視齒方明

註

按小兒變者變其情態蒸者蒸其血脉故三十二日一

變每變畢則情態異常全嬰方論云變蒸者以長氣血也變者上氣蒸者發熱也輕則體熱虛驚

耳冷微汗脣生白泡三日可愈重者寒熱脈亂腹疼啼叫不能乳食食卽吐哕五日方愈古方以

黑散子紫丸子主之竊謂此證小兒所不能免者雖勿藥可也況前藥乃屬峻厲非惟臟腑不能

勝抑且反傷氣血慎之予嘗見一小兒至二變發熱有痰投以抱龍丸一粒卒至不救觀此

可驗矣若不熱不驚略無證候而暗變者蓋受胎氣壯實故也然其候與傷寒相似但以脣上白泡驗之亦有受胎氣壯實不熱不驚或無證候而暗變者不必服藥然父母愛子之心勝稍有疾病急于求醫而醫不究病情率爾投劑殊不知病因多端見證相類難以卒辨況古人稟厚方多峻厲之劑慎服可也

吐瀉

初生十日內吐瀉壯熱不乳或乳不消或白色先用白餅子下之後用益黃散和之 初生下吐

因穢惡下咽故也用木瓜丸主之凡初生急須拭淨口中否則啼聲一發穢物嚙下致生諸病

註

按芽兒初生之患多因乳母不慎七情不節厚味傳兒爲病當審其因以調治其母前所用之

藥恐臟腑脆嫩不能勝受治者審之

夜啼

夜啼者小兒筋骨血脉未成而多哭脾臟冷而痛也當與溫中藥或花火膏主之 若虛怯爲冷

所乘則脣青

註

按前證多因稟賦不足或乳母飲食七情虧損所致若面色白及白睛多者屬腎

氣不足至夜則陰盛而腹痛也用六味丸若臉青唇白或小便黃短屬脾氣不足至夜則陰盛而腹痛也用釣藤散若臉紅舌白或小便赤澀小腸熱也用導赤散加辰砂如不應屬腎火用地黃丸唇色青白口中氣冷或肢體冷或泄瀉曲腰或泄瀉不乳此脾腎虛弱用六神散兼嘔吐用六君子湯大便不化乳少腹脹用五味異功散加漏蘆令母服之兒病自愈兒亦服四五滴尤妙兒大數滴

驚啼

驚啼者邪氣乘心也當以安神丸主之

註

按哭而不啼多泪是驚悸也啼而無泪是痛也若因心

血不足用祕旨安神丸心火熾盛用導赤散木火相搏用柴胡梔子散肝血不足用六味丸所云十啼者蓋亦大同小異耳

撮口

若浴後拭臍不乾風入作瘡令兒撮口甚者是脾虛也若頻撮口是氣不和也益黃散主之

註愚

按前證果因浴後拭搥不乾用枯礬爲末搽之卽愈若兼乳母肝脾有熱助兒爲患當用加味道

遙散以治其母若風入作瘡邪傳于脾撮口者其害匪輕七日內患者其危尤速

胎肥胎熱胎怯

胎肥者生下豐厚目睛粉紅大便乾難時出涎水

胎熱者生下有血色時叫哭身熱淡黃目睛

多赤大便色黃急欲食乳並用浴體法主之

胎怯者生下面白肌肉瘦弱大便白水身無血色

哽氣多噦亦用浴體法

註

按浴體之法乃開發腠理疏泄陽氣者也其胎氣果熱在暑月底幾可

用其或胎怯而用前法恐復傷真氣也然此證屬有餘者胎肥胎熱也因母食膏粱厚味或怒火鬱熱胎怯弱者因父精不足或母氣虛弱用八珍湯父精不足用地黃丸俱加漏蘆令子母俱服

臍風

急欲乳不能食者此風邪由臍而蘊熱心脾致舌厚唇燥不能吮乳也

註

按前證果因外邪而唇

口撮緊者名爲臍風多不能救若心脾有熱舌尖痛不能吮乳舌本痛不能送乳者以柳華散敷

之若舌下腫如小舌者或舌絡牽痛或齒齲患白星俱用線針刺出毒血亦敷前散若唇腫痛或

裂紋作痛以當歸膏調前散敷之若暴病發熱作渴飲冷大便秘結用瀉黃散疏導其熱若病後

發熱口渴飲湯大便不實用異功散調補胃氣若服攻伐之劑兼嘔吐或腹痛脾胃復傷也用四君子湯或口角流涎或痰氣壅盛脾不能攝也用六君子湯若兒自食甘肥或母食酒麵致兒口舌生瘡用清胃散以清熱若作嘔少食泄瀉用白朮散以補脾若手足並冷或腹痛惡寒用六君炮薑以溫中若因乳母飲食勞役失宜致兒發熱用補中益氣湯因乳母肝脾二經血虛內熱傳兒用加味逍遙散八珍湯因乳母肝脾鬱怒血傷內熱致兒爲患用加味逍遙散加味歸脾湯俱加漏蘆子亦服數滴仍參前弄舌類凡針重舌以針直刺不可橫挑恐傷舌絡則言語不清

胎黃

若百日或半年不因病而身黃者胃熱胎疸也若淡黃兼白者胃怯也

註

初生身黃壯熱不乳便

祕此爲胎熱用地黃湯若二便赤澀腹脹面赤飲水用茵陳湯調五苓散若清便自調四肢並冷用益黃散淡黃白用調中丸

語遲

若患吐瀉或大便後雖有聲而不能言又能嚙物者非失音此腎怯不能上接于陽也當以地黃丸

主之凡口噤不止則失音語遲

註

按前證多因稟腎不足蓋腎脉繫于舌本非地黃不能治故患

此證者若仰首呵欠則嗽如未應須兼以補中益氣湯滋其化源若陰火上炎肺金受傷而失音者亦治以前法保嬰集云小兒五六歲腎氣不足而不能言者用菖蒲丸口噤不能言者用地黃

丸

行遲齒遲

長大不行行則腳軟齒久不生則不固皆胎弱也

註

按前證卽五遲之證也蓋腎主骨齒者骨

之餘也良由父母精血不足腎氣虛弱不能榮養而然耳有肝腎虛長而不能行者有肝氣虛手足拳攣者有肝腎虛而腳不能舒展者並用地黃丸滋補之有心氣虛而不能言語用團參湯補中益氣湯培養之若久病或五疳所致者但調補脾胃爲主全嬰方云頭項手足身軟謂之五軟證皆胎稟腎氣怯弱也

元張從政儒門事親 夜啼

夫小兒夜啼不止者當用燈花一枚研細隨乳汁下併三服則每服用燈花一枚服罷此藥於淨室

中臥一兩日卽止也

拗哭不止

夫小兒拗哭不止或一二日或三四日乃邪祟之氣湊于心拗哭不止也有藏經一法以綿絹帶縛手足詎用三娃婦人淨驢槽臥小兒于其中不令傍人知而觀之移時則拗哭自止也

悲哭不止

夫小兒悲哭彌日不休兩手脈弦而緊戴人曰心火甚而乘肺肺不受其屈故哭肺主悲王太僕云心燥則痛甚故燥甚悲亦甚今浴以溫湯漬形以爲汗也肺主皮毛汗出則肺熱散矣浴止而啼亦止仍命服涼膈散加當歸桔梗以竹葉生薑礞石同煎服瀉膈中之邪熱

小兒風門

凡小兒三五歲或七八歲至十餘歲發驚涎潮搖擗如鋸拽不省人事目睛喘急將欲死者內經曰此者得之在母胎胞之所受悸惕驚駭恐懼之氣故令小兒輕者爲驚風天弔重者爲癇病風搖胎中積熱者爲臍風已上諸風證可用吐涎散吐之吐訖宜珠犀龍麝清涼墜痰之藥其食乳子母皆

宜服之安魂定魄之藥定志丸之類是也故婦人懷孕之月大忌悲憂驚怖縱得子必有前疾小兒風熱涎嗽者可以通聖加半夏同煎溫服

朱震亨心法 小兒論

乳下小兒常多濕熱食積痰熱傷乳爲病大概肝與脾病爲多 小兒易怒肝病最多大人亦然

肝只是有餘腎只是不足

小兒夜啼此是邪熱乘心

註

夜啼小兒臟冷也陰盛于後則冷動

冷動則爲陰極發躁寒盛作疼所以夜啼而不歇

小兒變蒸是胎毒散也

幼科全書 胎疾

凡小兒在月內有病者皆胎疾也並治其母小兒月內腸胃甚脆氣血未充若有微疾不可妄施補瀉恐傷臟腑臟腑一傷將貽患于終身或至天命可不戒哉如不得已而用湯丸毋伐天和中病卽止又不可過劑也乳母服藥必別擇乳母乳之而後可補可瀉也若尊母自乳則不可亂投湯藥蓋產後之婦氣血甚虛有補無瀉苟兒有熱而用涼藥則犯產後之禁必害其母如有溫補則反助小

兒之熱又害其子醫者人之司命偏害之事而可妄爲乎必須斟酌謹慎勿損陰驚也 凡小兒

生下就死者急看兒口中懸癰前齦上必有泡塞住卽以手指摘破其泡速用軟綿拭令血淨若血入喉卽死 萬氏曰兒生十日之內常抱向明處視其口中爲要

凡小兒初生下氣絕不能啼者必因難產或因冒寒所致急以綿絮包裹于懷中未可輕斷臍帶却將包衣置銚中向炭上以水煮之又作大油炷點著往來于臍帶上下燎之須與熱氣由臍入腹便能啼哭方可洗浴却斷臍帶若不如如此急救便斷臍帶者多死不治 萬氏曰俗名悶臍生卽寤生鄉俗有連呼其父乳名卽醒者

凡小兒初出胎時被風寒所吹鼻塞服藥不得者用天南星爲末生薑自然汁調成膏貼額門上自愈 萬氏育嬰貼額法加北細辛葱汁更好

凡小兒生後或月內或百日痰多氣喘目閉眼赤眵泪神困呵欠遍身壯熱小便赤澀大便不通時復驚煩此胎熱也因母平日恣食辛熱貪服煖藥而致以涼驚丸黃連解毒湯治之 凡小兒生後覺口中冷腹痛腸鳴泄瀉昏昏多睡或夜啼此胎寒也因母喜啖生冷或有外感多服涼藥致傷

胎氣以理中丸勻氣散治之

凡小兒生下浮胖遍身紅色滿月以後漸漸瘦弱五心煩熱此名

胎肥又有生下面無精光身無血色目無精采肌肉瘦削者此名胎怯並宜內服八物湯而外用浴體法 凡小兒生下遍身面目皆黃狀如金色身上壯熱大便不通小便如梔子汁乳食不思此

胎黃也因母受熱而傳于胎以地黃湯治之

凡小兒生下壯熱番眼握拳禁口直目涎潮搖

熱目閉面青此胎驚也因母忿怒跌撲以致觸胎視其眉間氣色赤而鮮者可治若黑暗者不可治以至聖保命丹金銀燈心湯下 凡小兒生下大小便三五日不通者此名鎖肚胎中受熱熱毒

壅盛結于肛門閉而不通無復滋潤急令婦人以溫水漱口吸啞兒前後心并臍下手足心共七處凡四五次再用輕粉五分蜜少許溫水化開時時少許服之以通爲度如更不通卽是肛門內合或以金簪透而通之須刺入二寸許以香油和蜜納入孔中糞出爲快也若肚脹不乳作呻吟聲至于

一七難可望生

凡小兒初生時卽不吃乳者此由拭口不淨惡穢入腹致令腹滿氣短不能食

乳或有吐嘔乳不得下或胎中受寒令兒腹痛亦不吮乳此則多啼俱以木香散治之

臍風